

四庫全書

集部

欽定四庫全書

集部

姑溪居士後集卷

一至五

詳校官庶吉士臣吳烜

侍讀臣孫球覆勘

總校官編修

臣

王燕緒

校對官中書

臣

高中

謄錄監生

臣

徐夢吉

欽定四庫全書

姑溪居士後集卷一

宋 李之儀 撰

古賦

夢遊覽輝亭賦

露下木落天宇澄徹日欲傾顏蟬方淒咽姑溪居士支
筇步屨臨階之絕顧視節物推遷歲月感覽輝之昔游
詠生塵之羅襪惆恍差池躊躇騷屑御者不進將誰與

說既鵠立以不怡疑株拘之無別已而人斷風微月出
雲裂繁星不能蔽其光萬籟于此號其穴茲欲遣而不
暇更百糾而千結于是解衣就枕寤寐纔分紅舒綠卷
蘭郁麝薰更笑語于鶯燕襲環珮于烟雲恨秀絕之不
與方展轉而凝魂忽若星墜倏如鸞停拊背藉以相款
極情柔而見文謂予之約何爽叩予之實彌勤顧倚玉
之未及俄司晨之遽聞嗚呼夢邪覺邪則亦莫知其然
哉今已非是昔安可追徵夢幻于物我遂割昵網于頑

癡庶几夢覺與今昔不能俯仰于羣迷

古詩

七言

晚過王晉卿第移坐池上松杪凌霄爛開

清風習習醒毛骨華屋高明占城北胡床偶伴庾江州
萬蓋搖香俯澄碧陰森老樹藤千尺刻桷雕楹初未識
忽傳繡障半天來舉頭不是人間色方疑絢塔燈炤耀
更覺麗天星的歷此時遙望若神仙結綺臨春猶可憶
徘徊欲去輒不忍百種形容空嘆息亂點金鈿翠被張

主人此况真難得

題王子重出李成所畫山水

主人邀我登閒軒軒前景物祇欠山坐來慘澹若不足
引我忽到營丘間營丘山水天下知全齊十二雄一時
舊遊歷歷如到眼吾宗筆力窮高低岌雲巖靄互隱現
老木蒼藤紛綵絢瓏璵特幹勢將壓奇崛欲夸人未見
石磴流泉似幽噓洞穴縱橫乍明滅舉頭樓觀俯懸崖
定須六月臨飛雪行人初踏山前路款段衝寒怯回顧

蹇驢亦自樂平地彈且徐行方得趣日西平遠連何處
極目蒼茫天欲暮行人端是我前身斗覺精神相會聚
百年瞬息竟誰真此老應無一點塵主人等是風塵外
豈是閒軒久住人

子重家有閒軒

觀子重鐘隱鷄鷹圖就借傳本畫乃文康舊物
千年老木根半拔叉牙枯枝闢金鉄蒼鷹見鷄豈復捨
伺隙必拿將雷掣鷄知不免怖且死銅觜窺鷹反噪聒
陰風慘慘天為改殺氣憑陵欲翻海畫工已證三昧因

造化精神智能采江南山水多異人遁迹往往隨風塵
等閒應現非一化流落終為絕世珍王公盛德天下歸
想見乾興天聖時進賢退佞乃所嗜不使異趣侵毫釐
喻公為鷹固不可排擊奸邪力尤果開圖凜凜毛髮驚
滯蔚頓攄如破鎖公孫勝致有餘風十年淨土常相同
擬借傳摹應見從意欲因畫時見公

次韵胡希聖登毘陵東山亭

君不見狐裘相齊望前古後日執鞭固欣慕煙雲得趣

更飄蕭常使高人恨無路闌干崢嶸擅空濶寒日低回
得循步朱輪想見不可從南國小棠疑未去百年暴輝
實之賓俯盛仰衰情易新孤懷直欲共傾倒衣上元無
一點塵又不見三千珠履春申君十年天祿揚子雲極
目平原草縈骨秋月春風愁殺人五湖歸去辨之蚤擊
鼓撞鐘猶恨少險語緩絲一劒休九衢相視空草草荆
州萬里控上流歌舞翻風甚飛鳥回首蒼梧隔暮雲南
狩不歸何可叫解后相逢情更親芻狗疇能誇已陳欲

書醉語致多感好事今無載酒人班班微陽度密竹嘖
嘖寒雀喧荒榛韋郎所紀十無一安得遺老酬諮詢
蹢躅難堪隨末俗健論愛君如剪竹寧人負我無負人
咄咄老瞞徒四目直絃易斷曲未終鳳髓難容斷誰續
白首胡君到孤獨在何分金齋鮑叔

送李仲益赴濠梁司戶

炯然五府不受塵深山大澤猛虎蹲豫章千尺若可抉
滄溟萬里疑平吞秋天一鷗禰正平人物南州龐士元

莫詠濠梁好風月當知猿臂出吾門

閩僧饋紅糟炒笋

食飽舐指老更深飢腸南北常歌釜曾作閩山對岸客
海舶供看常相尋一路埃塵春幾換葷羶裂腦愁舉按
淮陵巨海不多程多情誰殺能鳴雁道人雅好逾千金
短茁漬味羞春林呼兒續飯不知飽未徹已到閩山陰
孤風冷石常齒齒不忘南音似君子寂寞相求義愈高
豈特今朝共隣里

胡希聖在毘陵有詩私送比過山陽復以其韻

送之

寒雲四塞客日短一壺臍裂洪疇中君家大門我父黨
覓白聊復相過從和香索料多甲煎幽蘭幾弄理孤桐
爾來行李偶南北齒齒不見雲間峰登山臨水不無思
獨笑往往捫長松蓬門春晚燕語好書幌迤邐來清風
五府帶垢一洗盡萬里古色開愁胸輞川何在廣文死
比比孺子誇有功楚人僅免二日苦却嗟白壁埋蒿蓬

逡巡取酒叙契濶百川赴吸驚長虹風流未愧正始後
淪落丘范評無鍾君才有用豈特爾我亦相將成老翁
騏驎得路即千里會看拭目天邊鴻

登鶴雀樓

大河南奔山北走臍裂天涯懶回首撞鐘擊鼓醉橫參
恃險英雄骨已朽歲暮風烟尤可悲功名白髮不相期
重來好是當晴日應有鷄羣翡翠兒

送鄭產莊

酌君白玉杯送君正黃梅長安風沙眯人眼君行暫詣
黃金臺劇辛已老樂毅去荊棘平地多龍媒九重深沉
四海遠快便誰許叅雲雷黃金臺高不易上并州雄節
幾塵埃當時勲業皎白日餘風表表皆雄才龍睛豕腹
實異相肝膈上下羅瓊瑰丹青萬物大門壻妙論尔汝
無嫌猜同時舒卷一門盛將見裂火生寒灰十年早飛
不足歎青雲自此亨途開我暫追隨極天未有酒取醉
長追陪離亭雨足綠蔽眼健帆危挂寒風催黃金臺不

知幾千尺勸君宰衣直上首莫回時我歲豐亦足被君
賜還須遠過青山隈

晚步汴堤始見春色次夜與蔡君規鄭希仁同
飲進奏官舍

昨日行河堤柳色綠如埽只疑晚煙罩寒林細看始知
春已到春來本不與我期病中蹉却春來時塵埃雨過
風不起但見紅紫吐吐陵高枝年年見春隨分喜今年
見春略無意泊然相遇等幻化況是客愁如夢裏前年

隨春入都門去年探春海上村今年作客還到此萬里
漂浮誰與論故人邂逅羅酒樽白髮相逢情更親身世
崎嶇有底急終日裂臍如歸雲倚門幾夜環連夢勃窣
稚子行逡巡扁舟早晚東南奔車馬紛紛愁殺人

送俞叔通歸四明

終軍棄關繻李斯逐黃犬功名事業自有時咄嗟所得
亦蹇淺雷奔電掣千里雨魚變為龍如掌反侯嬴抱關
誰復論公子感之在一言擔簦屐履遍列國平揖相印

須臾間箐中不死魏齊困口中舌在天應旋莫嘆髀肉
消休悲釜生魚揮斥八極神不變秦人豈識照乘珠氣
吁虹蜺亘天地有時一笑海可枯泰山排雲天下小紛
紛何足論賢愚得君本如此君知我無朱幾年飛鳴共
搶榆長慙瓦礫叅璫璣都城踰月同朝晡蹙然別我還
舊廬引君一杯酒洗君衣上塵我歌雖促非酸辛未忍
祝別惟加飧直教採取虎穴子西來射策黃金門

次韻孔經甫題剡縣史氏競秀堂

天姥迤邐沃州繁萬壑千巖相汲引崢嶸不知盡何如
撐突雲煙隨望隕來蹲去伏搏虎豹上圓下妥蒸芝菌
溪流縈紆湛寒玉飛泉滴瀝調金軫天造神藏發有時
眼力收羅一朝盡連甍接棟插星斗檻欄分明噓老蜃
薄遊曾向畫圖見幾欲微吟寫秋蚓登臨更想新醅熟
紫巖堆盤參竹笋排坐歌呼來謫仙落筆篇章陵醉尹
晴春雪霽夜月滿此樂誰能計畦畛到者如行避世村
回首紛紛只堪哂因君歸興不自持安得陵風跨蒼隼

兼江祥瑛上人能書自以為未工又能詩而求
子詩甚勤子以為非所當病也為賦一首勉之
使進于道云

得句如得仙悟筆如悟禪彈丸流轉即輕舉龍蛇飛動
真超然禪瑛迺醉我顧慙道玄戲將字畫當杖拂與子
憑軾相周旋筆若運矛矧手如致禪偏眼能援桴鼓心
為制中權棄捐尺度廢絛削似曲還直非方圓適當庖
丁善刀後但見滿紙銀鈎連心眼手筆俱不用擬向底

處觀其全思量不可到此地無中邊政似觀瀾亭上夜

深後滿空白月孤光懸

祥瑛侍者書置之魯直卷中畧无辨異惜其未常博觀義猷頗

柳遺蹟也右軍帖家家有之然後世遂不復有右軍至近世人書下手便欲逼真古今相絕如此瑛其勉旃

姑溪居士後集卷一

欽定四庫全書

姑溪居士後集卷二

宋 李之儀 撰

古詩

七言

次韻王性之見寄佳句

文質相乘徒野史
拔山塞海終軍死
早時妄作不朽計
掇拾餘疏自網紀
跳梁蹙缺固無有
白首何堪墮牛李
冥行觸柱猶欲前
布襪青鞋從茲始
春風罽頭問時魚

莫雨洲中吟白芷爾來蹭蹬十二年尚向牛角驚鬬蟻
亭亭日沒見初月宛是角中逢綺里萬頃烟波渺天末
十丈霜松騰澗底幾從窈窕泛斗槎終愧婆娑參珮藻
晚來鵲話頗不凡俄報翩翩航一葦元龍豪氣不少除
樓卧超然遽思起問途直指三峯去盤馬樓前萬人喜
亟發健句壓欲到似不見容已無齒便期脫帽灑風腴
豫宿寒春絮雲子定應一笑非等閒更想筆端如瀉水
唐公兄惠顧海上既行輒有詩奉送

憶乍扁舟下京口六月江頭浪如吼一笑還尋浮玉叟
山半飛雲似招手月明上舫縈宿酒倒摘沈星疑犯斗
夜深歸夢徹東吳覺來落月穿疎牖山僧流連強終日
黃昏歸鳥凌風疾玉骨蕭森病枕餘一語才交復相失
先生高節如古人薄宦淹面行路塵海城寄食不自給
暫喜持盃同探春春風花草來踈踈微紅淡綠意旋新
相從白髮情未壓底事促別聲悲辛淮陵欲到嗟無因
想見蔓草縈龍鱗浦光亭南拍隄水冉冉落日低孤墳

全宋文卷八
卷二
到時春色應已遲滿樹黃鸝初囀時憑將一曲原頭淚
為洒南坡松樹枝

阮公嘯臺次韻辛正叔

有口莫飲盜泉水有手莫探驪龍珠秋風冷落千古意
追風絕足誰能拘白雲青山避世樂擊鼓撞鐘廊廟居
等閒舒卷四海為之動豈憚一一從吹竽君看事事絕
天險阿房宮在空荒墟野人不識貴者帝直欲炙背同
向茅簷隅由來土苴漫優劣臺臺傳習隨有無當時一

嘯亦偶尔至今登覽煩嗟歎吾人妙質素所畏感嘆陳
迹追盈虛涇清渭濁固可辨未應到海君能殊

王為道東軒梅花小桃相次弄色置酒見邀出
瑠璃盆浸花貯酒半移即花既辭留名壁間

搔髮滿爪垢撲衣滿襟塵百年信幾時吾生苦紛紜黃
河源從天上流忽然河底為沙丘張良身不滿三尺從
使沛公君列侯淮陰小兒亦何者俛首無辭出胯下晨
炊蓐食為得計一飯千金豈無價相君之背貴莫言前

趨鼎鑊何等閒使為故主已梟首奏事猶如冕旒前軹
深井里有屠者荆歌壯士不復還伯樂相馬只相骨咄
咄常情迷賈鞭春來萬事不欲語惟願沽酒不著錢大
鐺長杓酌還引日日如此過百年相家新有檢正官謂
我落鬼早見憐東軒小桃間梅蘂清香秀色能相先下
將貴勢略雅舊脫巾取酒容流連瑠璃盆深花透過愛
花移向花邊坐時時飄蕊落盆中冉冉天仙空裏墜
醉後草書疑有神墻間怒角拿飛雲掃禿千毫興未盡

惆悵粉壁何時新
盆空不記上馬去
曉來但見衣巾污
古人名節堆故紙
多少沉埋不知數
明朝花落
在須臾
莫遣高門無入路

次韻參寥杜孝錫

君不見深山窮谷千丈潭
懸崖絕壁倒挂松
雷霆雨電
有時一洒遍八極
繁霜雪霽能邀夜
月來高穹又不見
江頭龜手泝泝統裂地
得侯終有逢
長安大雪幾千尺
高卧不愧衣玲瓏
揖人而相若
反掌登天有路非難通

天之可上勢或使得相乃在須臾中朝冠貂蟬暮薇纓
曲肱何在三千鍾方東遽北安足究豈異海舶隨狂風
舞雩而詠吾與點坐中客滿誰知融屹屹杜夫子靈芝
翳深叢百年轉盼皆腐朽且將逸駕聊與同我慙圭觚
刺人眼空向霜天望飛鴻

送李仲益及第調濠州司戶還錢塘

憶昨西湖弄烟月玉面少年搔紺髮六月正午斷人行
坐上無風不覺熱長安塵沙五月尾汗透纖絺甚懸水

相逢愴怳秋已深冰骨令人冷如洗吾家謫仙應已朽
采石風流誰可後却恐騎鯨下紫霄斯人豈是人間有
春風標名冠禮部睥睨英豪皆培塿三月飛花試集英
筆下光芒射斗牛共說唱名須第一人事天時良可必
大任先當益未能何謂揚雄老終吃滄溟洵湧百怪見
鯨鬣蚪髯豈難辨莫謂卑飛遽自陵功曹曾是將軍願
集賢學士文章舊平日追隨今太守到日應須倒屣迎
還聞下榻南昌秀濠上觀魚魚正躍攜手何人知此樂

妙處期君向上求可笑蝸牛爭兩角

為道見還詩因次其韻兼簡孝錫

反衣狐裘矜綠裏月落宵行易淪委
崎嶇身世等秋蓬皎皎吾心淡如水
青雲有路誰引目肯學荒疎輟洗髓
經營一飽困南北未易功名輸故紙
爾來投迹間諸彦白雪每容參下里
何殊溺者得尺素聊謝箕翁徒洗耳
大官供飽事鉛槧時引古人同淨几
枉老王郎特我賢華袞相先慙溢美
清風冷落勞悵望誰謂雲間見黃綺

因收倦緒聊紡織半是棄餘安足喜一片簫韶送下天
遊遍華胥如喚起從此修途可問津豈復龍頭却蛇尾

送陳瑩中及第歸洪州

七月江南秋已到江水如天魚尾掉處處團橋欲黃時
家家門前艤歸棹西山佳氣徹青雲潘郎門巷如深春
陳家有兒新及第新着恩袍歸見親為報行人洗眼看
養兒如此誰不羨願兒不要重科第事業功名他日見

古東門行

元鼎元年東有兵未央催班不待明龍驤虎步擁旄出
蟻蟻部曲隨鳴鉦三千珠履皆上客囊中有錐誰為發
莫歌雌兔眼迷離長城可倚知在誰千羊不如一狐腋
草底寒蟲漫啾唧兩口四目未必智天下奇才余星墜
舟中指可掬冀北馬羣空漆身吞炭為國士射足接處
謀已同義感丹誠虹貫日壇上成功方頃刻縱有明珠
千丈長安能保得頭長黑

春日同梁十四醺李公昭朝霞閣侍兒舞梁州

曲徹客有以潤羅為贈公昭命玉杯滿酌酬之
又以金鍾邀兒相属既醺出烏絲欄索詩

都城春風吹落花都城九陌無塵沙貂裘公子醺何處
闌干百尺陵朝霞鳳箏新調玉指軟黃金捍撥當胸遮
紫檀屢碎翻成拍紅茸毯襯鷗頭襪回旋誰許綵雲輕
欲斷還催猶未徹新鶯弄雛乳燕飛一曲涼州春日遲
百足纏頭隨玉盃咿啞一闌爭扶持公子笑不已下客
懽正濃更邀姪姪持金鍾一酌直欲滄溟空從他海若

在平地明珠墮淚愁蛟龍珊瑚突兀撐高峰便疑巴姬
御來風月漸滿銀河低歸路促街鼓稀何時再到紅茸
地更倩游絲惹住衣

此篇與前集白鈴轄席上聽
琵琶歌數句畧同姑兩存之

盧泉之水次韻晁堯民贈張隱人

盧泉之水名河長裂臍不到空莽蒼讀君詩句心已涼
便覺滿耳清浪浪彼方逐臭如竊香肝膈素飽神鷹揚
有客飮水衣朝陽脾脫不語中何傷過從德君想更樂
直欲造化窮微茫何當相從老此水桀跖夷齊均是死

飲散留別希仲自江州倅罷歸壁間掛廬山圖
約為象戲終席不果又約明日而繞徹余遂行
密雨着地三四尺斑駁雲開日已西坐來指點經行處
問我何年別虎溪十分酒到一舉盡笑我強飲如登梯
燈火熒熒夜未艾回首但覺娥眉低今朝未食先破趙
明日憑熊欲下齊門外馬嘶獨未起據鞍纔許趨鷄啼

姑溪居士後集卷二

欽定四庫全書

姑溪居士後集卷三

宋 李之儀 撰

古詩 七言

和張文潛喜東坡過嶺

紛紛擾擾何為哉
一身之餘皆儻來
當前荆棘誰所樹
到了醯酸蚋方聚
公歸斯文乃有主
公去妖淫幾人誤
狐狸罷嗥蛟龍衆
戶外何嫌常滿屨

合流遇潘子真出斯文相示因置酒子真黃九

門人

山谷老子天不見豫章詩人何許來章江未覺清徹骨
西山一帶寒煙開文章明鏡現諸相句律蟄戶驚春雷
紅爐勸坐且一醉為我更賦揚州梅

撫須寄傅子淵

一日幾回撫白鬚我本于世非葭莩奈何寸沫長自濡
起倒不供須人扶眼前擾擾嘈笙竽況于得失隨有無

鼠壤狼籍多棄餘史雲空悲釜生魚抓搔世垢清肌膚
愈下愈拙真挈壺愛極并愛屋上烏古詩有之今輒如
不願百尺騰龜趺不願去為在涇鳧只願卒歲眼長淤
百無所見常踟躕出門撻埴尋君居萬里付於千里駒
送保定錢弼達且約相見後行

平生不願與物迂所向未始值坑谷濁斯濯足清濁纓
世間此理固纖曲朱顏見君一笑可兩眼照人光煜煜
深沉不可犯毫髮遲暮已許同松竹去年相逢儼如昨

歎我何殊侵曉燭衰殘壯盛等復虛且可清樽對聲藪
軍興百邑不可遏與期縱橫猶沸粥念君去替無幾日
頗復驅馳隨檢束君方撫掌笑我迂物理循環同一局
有來則受去莫追忍看紛紛自魚肉我愧君言但首肯
明朝君去追奔軸臨行春色已無有勉強歌呼趨紅綠
思君不見一長吁忽得書來親愈篤約我歸來叙離別
滿紙抑揚疑諭蜀豈知重門鎖白首迹雖伏檻心麋鹿
寄聲少作旬浹計莫便雲間叅去鵠乖離會合杳難量

君能規規如世俗

得璉老莊僧書所報周恙且速東歸既愧其勤
因述書語為謝仍約官滿就見

故人書報新種畦東臯豆麥稻水西更添莊屋成兩脫
築出湧路排沙泥柳插千本竹萬个雞豚母子羣相携
又倚前岡闢場圃更下南泊來鳬鷺兩年課役已似此
數歲漸可如山溪吾師報地適我與胸中瑩徹真琉璃
一錢不敢力為盡只得一飯仍鷄棲我慙汨沒落陷穽

眼前差路知幾蹊
緬懷吾邦歸未得
書來未讀先酸悽
本無去來強繫縛
亦非顛倒隨傾擠
萬衆過眼即他物
列鼎既飽均朝齏
明年定作一村老
非施委曲誰刀圭
內侍劉有方畜名
畫乃內號國夫人
夜遊圖最為絕筆
東坡館北客都亭
駟有方敢跋其後
既作詩以相示時
欲和而偶未暇今
閱集得詩遂次其
韻以申前志

天街雨過花滿窓
萬人壁立驚游龍
飄飄衣袂欲仙去

寶鞭遙指蓬萊宮真人睡起春纔柳誰眷琵琶最先手
合懽堂裡謝使人暗香猶帶天階塵宛然相對若可語
筆墨頓失當時痕開眼成今合眼古回頭自有來時路
長風破浪真快哉快處須防倒騎虎

常愛東坡去年花落
在徐州對月酣歌美清夜
今夜黃州見落花
小院閉門風露下
二詩因即
其韻聊寄目前

老來不慣離家久
獨卧一庵今八夜
抵搔十爪垢已滿

降伏千魔心未下
癸癸病眼日更昏
皎皎孤懷誰與瀉
恨無鸞帳與誰俱
獨有筇枝伴身亞
華嚴性海偶深味
兜率陀天聊復借
平生好書陋顏柳
近日作詩幾沈謝
百年旅夢行將覺
萬里家園猶未舍
妄緣儻或未嘗膽
佳境安得如食蔗
從來少味燕偏知
早已忘機鼠休怕
行當遂作重屏圖
闔茸凡材任譏罵

世圖白老謂
之重屏圖

良霄明月為誰好
記得初來正合夜
城頭火客喏不斷
花上鵲棲驚欲下
更深未覺單衣怯
風細只疑清露瀉

漂流南北心已老綿歷間關身自亞傷心黃卷不相契
過眼青春難更借那知交臂輒深扃驟學問因誰與謝
家書杳邈隔重嶺客飯酸醎真傳舍慙勤兒女置隻鯉
璀璨盤蔬勝木蔗定知何日遂能歸却憶今朝真可怕
解衣就枕已多三喘咄多言翻自罵

初夜有雨意欲曉風大作

昨夜雪深疑有雨五更還作掃雲風我于此地雖無責
傷時失事心則同起來悵望一吁歔又覺裂日侵堦紅

隔牆鼓吹去何許，入戶哀怨號無蹤。尋花戀藥尔自樂，啼夫哭子情無窮。平生感慨垂老別，異時獨與新豐翁。邇來眼力不解事，彷彿推墮此境中。天公豈肯違一物，尔且莫嘆杼柚空。無心致禱禱必應，會見一雨半年豐。

送慕容若提公幹環慶邠寧

四月邊城氣如煮，問龍乞水將致雨。起我獨有泛蓮人，相與授誠香一縷。腹枵不擬謝僧疏，愁對焦枯無告語。君時捧檄不我捨，意欲同分神所怒。此誠未契我輒罷。

想望絕疑隔烟霧一朝報我檄難留明日清晨離此去
我慙君住本為我君行我乃不得祖固知身世不相期
戚戚安能效兒女君還我亦脫韁鎖聞道荆醪如潑乳
使君況是我輩人便約臨高目東注經由第一莫遲回
尤物須知原有主

再次韻并寄寧州孫子發

顧我從來奈烹煮況復顛風并怪雨出門未必趁鴻鵠
閉門何曾下絲縷比來重作坐禪僧日與虛空相晤語

初非小智肯自私終謂大國不可怒倦途傾蓋得吾人
獨喜山行逢豹霧僅愧衣融累歲留猶勝投閣經宿去
東州勝事久欲講老滕元將效懷祖
初欲到邵接小兒豈知敏
手驟輸君使君方詠羅敷女願侍一笑作先容試覺醞
醕分酪乳寧州別乘吾所畏屹然萬弩不得注寄聲到
眼不須論畢竟生涯誰能主

喜雨用前韻

凋瘵厄殘不勝煮欲救鑊湯須是雨天公愛人甚赤子

忍將性命輕毛縷使君屹起石門城歸路壺漿喧笑語
定知此雨必隨來何用與龍爭喜怒初疑點點洒醍醐
漸次濛濛縈瑞霧一滴入地須一尺萬室焦枯如洗去
我慙無力助精虔獨致微誠祈佛祖深局不得陪賀燕
坐跂歌姝參舞女近傳一斛出六斗盞面浮蛆泛牛乳
煩君說與猿臂翁留得滂沱猛如注醉中寄我慶豐謠
想見今朝賓與主

謝慕容若禔惠橘皮湯用前韻

有幻色身同一煮誰振楊枝洒甘雨一息不御百虐隨
邪正交差窮脉縷昔人有術我得早自約初到必與語
日來靜坐不能遣痞嗑忽作河豚怒腹腸迤邐吼雷霆
嘔啞繽紛雜珠霧吾僚恩勤漫馳告果為新留陳輒去
君臣辨正叅苦良物物經營本農祖一杯狼籍走三彭
再吸逡巡失魔女恍疑身在清涼國無異金堂逢石乳
便當竄入經驗法何用忉忉增補注多慙世語必見臨
不會作客勞煩主

謝傅子淵惠齏醢

一罌漱艷香馥郁刻意傳來敵珠玉畫屏當裨世俗珍
獨喜小甲隨宜粟老翁病起踈匕箸頓覺加餐不勞祝
喜輿頗訝併日食庖有力疲憂斷續舌根有相未須遮
定應雙笋沒春芽只愁此法不能錄歸去尋思空自嗟
天酥辟易醞醢醢且從樂處為生涯他人若問真消息
請向原州覓傳家

築城詞效張籍體

齊眉去朝天回一聲號千聲催土勻纔布一搏許試錐
只恐錐鋒摧萬仞連雲絕川路胡騎回還不敢覷但云
本是漢家地如此携家渡河去渡河去莫回頭漢家人
人要首級渭州門外薺尔喉

寄耀州畢九

造物于我終何功寓形宇宙一粟同由粟而形則可物
自形而我如飄風我初與子未束髮長我一歲今皆翁
間關世故憂愁集悔不相向但盲聾邇來夢寐亦驚噩

無異舩鼓撾蓼蓼建塲作戲固聊爾隨緣應責疇能充
邊城氛埃蔽天赤春物豈暇尋青紅頗知別乘甚相得
共玩雙翠臨雕籠酒闌起舞屢脫帽笑指落月如懸銅
何當容我作鼎足未易歸馬催匆匆

壁間所掛山水圖

老驥無能空在閒苜蓿既飽思行山誰知尺幅分向背
恍如百里隨躋攀雲煙濛濛心共遠草樹陰陰日將晚
一聲幽鳥隔前溪萬古回春來疊巘涼風彷彿飛清霜

奉身九折忍王陽嗟我胡為不自愛逐物顛倒輕餘光
爪羅活計知何日相對無言搔短髮芒鞋竹杖清自在
皎皎吾心真匪石

送郎祖仁罷九江稅省親仙源

石磴縈紆行一髮不見滄溟湧初月不應佳氣無所歸
十載聲名藹吳越香爐峰下新解官足馬又過桑麻間
知有秦人篆字否不妨高處小塵寰

姑溪居士後集卷三

欽定四庫全書

姑溪居士後集卷四

宋 李之儀 撰

古詩

七言

四時詞擬徐陵用今體次東坡舊韻

春

紅綠枝頭自開落
薄日低雲天一幕
可堪困緒尚眠蠶
未擬歡心隨破萼
寶環半脫畏侵肌
百刻縈香竟屬誰

旋製稱衣宮樣窄慵看架上去年衣

夏

蜀葵易過紅榴永鱗鱗瑩角波紋冷水光汗透玉枕涼
扇影風搖深院靜無言一向幾回顰品盡么絃竟不勻
空被梁間偷眼燕黃蜂元是竊香人

秋

畫圖展盡瀟湘綠窈窕新詞寫啼竹薄衾笑拂又經年
已報莎雞入重屋漸施簾幙作深局時看明河步廣庭

旋索羅衣防露下隔牆聞呌侍兒聲

冬

休願車輪生四角莫向金樽嫌酒薄門外風號鴈陣低
擁衾同看殘燈落轆轤敲凍驚棲鷁睡紅笑引燕脂霞
未擬雕籠問鸚鵡先投宿酒敵霜花

次韻東城所畫郭功甫家壁竹木怪石詩

大枝憑陵力爭出小幹縈紆穿瘦石一盃未釀筆已濡
此理分明來面壁我嘗傍觀不見畫只見佛祖遭呵罵

人知見畫不見人紛紛豈是知公者汗流几案慘無光
忽然到眼如鋒鋌急將兩耳掩雙手河海振動電電吼
荅吳子友見寄昔與子友同書局以此韻往來
各人十二篇今子友仍用元韻遂復次之各十

三篇矣

憶昔棖題雜梁棟懷璧握珠容抱甕大宛天馬本不羈
掀耳轅駒援就控撈蝦摸蟹力易盡搏虎擒蛟殺方痛
君時正射晁董策直把黃金變鉛汞顧我哀遲特相子

許我過比儀韶鳳回頭已數云端午幾向夢中自占夢
邇來欲述陷膚語豈謂書詞情愈重琅琅楚虞奏未缺
杳杳燕鴻目頻送壯君已赴宣室召老來未棄蠖螟動
詩成新月半侵簾更聽樓頭角初弄

荅成都侍其純父用其韻

鹿頭關下花深處竹馬曾尋綵衣路雖知梨栗是生涯
人道風煙如鄠杜四十年來若斷橋問津無計冷瀟瀟
一聞此語心先醉似向江邊笋自燒羨君材器森諸有

寶帶垂腰今一叟未說常開壇上旗且須再遣雲中守
從來別駕不謀身欲作蛾眉會裡人本是文殊親接引
定應見處必逢君

蘇子瞻因膠西趙明叔賦薄薄酒杜孝錫晁堯
民黃魯直從而有作孝錫復以屬子意則同也
聊以廣之

薄薄酒勝茶湯剗麝臍為有香斷尾山雞避文章直木
先伐甘井竭誰將列鼎移黃梁揚雄草玄反嘲白麴蘖

寧非井丹食却念牛衣兒女心
王郎漫致回天力五湖
歸去美煙月伏劒成名空玉雪
飲薄酒醉後紛紛示何
有

莫厭薄酒薄莫惡醜婦醜君不見王尋百萬驅虎豹千
金掃蕩同拉朽又不見高堂笙歌午夜飲明日哭聲喧
正寢莫厭薄酒薄到頭一醉亦足樂莫惡醜婦醜携子
弄孫同白首高飛遠走固亦樂莫抹眼前忘時後

過雨飲臨潁何希仲家蒙督詩即席為贈

君不見張子房素書未授抵遊俠又不見蕭望之不能碌碌反抱關漢業已成赤松去殺吾賢傳終感嘆乘時致用固不免要須繒繳無由攀八十釣渭濱揮旌仗鉞興艱難臂鷹上蔡市復得不可空多言周傾秦得漢亦起虎噬鯨吞羝觸藩一興一廢竟誰有要之有數歸元元元元亦何為與君論子細須將劇孟作敵國未信葉公真勇士竊借聲名人自歎白公梟首方為是乾旋坤轉只等閒收放僅在毫端耳何郎目如電奮髯兒童驚

眼光在酒裏一飲黃河傾不作么麼貴公子橫行欲得
十萬兵吾語何郎少卑之犀有角兮麝有臍果知有累
不早計抑揚畢竟何所之滿酌勸君飲吾語無文章鞭
笞六龍駕扶桑上朝元君陪紫皇霞衣玉簡鬚如霜俯
仰八極何茫茫方時與君俱此舉如何煩君暫起舞舞
徹聽我歌我歌端為我輩作蠢蠢方類隨江河肯同兒
女戰蝸角酒酣雨淚揮滂沱

正旦日大雪過秀州城外聞樂神踏歌打鼓

歲除夜雪一寸許便覺新年喜氣多大觀元年第一日
一番勝事信可歌歌不已鼓聲起漫壟連村如市裡更
願雪深一尺餘收了去年三尺水

問傅子淵求冷淘醋

君不見東林木魚催萬指巾鉢紛紛似流水銀絲百遍
連夜具大解行虀如酒醴又不見親賢宅中午睡足花
簇春羔衍紅綠一窩隨首髮猶簷妖冶均調笑相續他
日何人叅智海研乳磨薑搗椒薤便覺廬山落眼中誰

為窮邊輒相會往還斷絕惟絨黠斲遠葷羶味蔘蔔親
賢勝事不可尋且向箇中求一則

賀李方叔得眉山玉堂賜馬公自書券

帝閑萬馬皆天寵一一盡是真龍種欲知志氣吞萬里
駿意向人耳雙竦翰林下直出玉堂狨鞍寶轡聲琅琅
傳呼一聲驚里閑新向庭中賜驕驕明年乞得東南守
畫舸西河卧載酒免令此馬老江山故用贈君良獨厚
憐君從來家若貧坐冷儒士喜意新自書券字甚雄偉

作書遠報江河人翰林好士裴丞相知君亦負玉堂望
願君寶此

下文關

五言

雨中自瓜步謁寶覺遂約遊黃杜寶覺遽有儀
真之行雨後獨往夜分方到泥滑路巖乘步相
半

夢寢東南遊金山居第一泊船瓜州口風雨繫黑日冒
雨訪老胡脩然出蘿華壁間十弟子云是王維筆生者

今何在別有一丈室相期同過之佳思久披拂差池成
獨往敢憚泥沒膝投鞭望橫參露重衣如濕方諸湛漏
魄指顧盡纖息目眩神為清壺冰蕩肝膈疊疊相問勞
軟語皆中律頗怪不預知有似驚暴客杈牙荐爐紅柔
脆脩林茁老浪感陸生明盤皎霜橘木魚動曉堂永味
固南畢百年驚枯槁平日膠在漆幅巾行此時歲暮悲
蟋蟀

金山寄懷秦太虛用建除體

建古求亡子寓意一何疎除道聲出師老將定胡盧滿
座語更發誰是囊中珠平生不少貸鮮不相謂迂定分
固有來跛驚叅乘駒執別纔幾日眷眷瞻雲衢破碎物
役爾此理君何如危步上傑觀疇昔相携扶成茲塵外
趨感慨反不舒收我漏盡景課君種樹書開山一百里
玉粒隨香蕝閉口不復語早晚同歸與

毗陵西城樓感懷

平臯已春風昨夜猶繁霜倦客驚節物遊子思故鄉樓

高白日促遠目空悲涼願言平生歡各在天一方
遨遊不可從山川阻且長安得一樽酒咿啞去
深堂孤懷昔蕭肩壯志猶激昂無階際玄護尚
期夢池塘飢鷹在千里怒鬣存三湘寒鴉似相
求依依度斜陽

秦太虛寄書云想君在毘陵廣坐中白眼望青
天也因錄此語為寄兼簡諸君

白眼望青天我乃厭多酒秦郎才語新高低秀
蜀柳春風昨夜來傳書自江口固為愁水光物
物慙我醜歸程

無日多僧窓不驚帚投懷二三子自許口不朽笑言忌
有累醜竿來所有莫問夜如何為君專一斗

維揚會張曼老陳瑩中分韻得柳字

我生固有地物物皆可口身行半天下荐飢無不有讀
書恨未博每索多掣肘一逢可意人似對靈和柳老來
益落寞永日類中酒北舟得二妙洗盡平生垢叅軍欲
陵春記室寒掛斗雍容送落日百衲為抖擻崎嶇等外
驚瞥眼自妍醜真樂極胡越誰可論不朽昔人固欣慕

僅欲操箕帚堂堂幾千仞未易窺戶牖逡巡即千里轉
盼百年久一笑且低回朱顏今皓首

姑溪居士後集卷四

欽定四庫全書

姑溪居士後集卷五

宋 李之儀 撰

古詩

五言

次韻魯直留別

南北二十年短褐足塵垢九仍未及泉竭心恚地厚積
翳開前山月在山之顏目斷兩黃鵠夢寐長躋攀我飯
苦多噎見君遽出氣定有囊中藥痿人果知起枯稿洗

朝露咀嚼玉壺冰蔓草豈自得香發須高陵齟舌真有
味辨口空齒落頓悟孺子歌會當濯其濁允蹈固未見
能言人亦難得微可齊語引置莊嶽間大路平如掌仁
者貴安宅直絃為君彈萬里等尋尺何年紀消子相向
猶木雞肝肺已自鏤土苴非所知

鮮于子駿用魯直見寄韻因以為謝

雲間彼上人處汙能見垢咄咄向風雅入國知溫厚別
來仰高山霜風刮衰顏新詩解人頤調古不可攀練練

瑚璉姿森森棟梁氣願學固有歸黯然由此起世味淡
于蠟孤懷冷如水十年問歸路歌舞懷西陵歲晏感飄
蓬老去委瓠落豈無杖頭錢斗酒不問濁尚平累愈重
欲去亦良難安得廁木鴈才與不才間遇君本有地悵
我將焉宅引領遡家山一望幾千尺何須驚墮葉會當
鑒攘雞風來北窓下此況誰為知

次韻子瞻古風詩二首

無兒晚讀書得之兩河場何待少陵詩閃閃已生光深

山秀蘭芽無人方自香未央鎖千門可知曼修廊俯仰
要自得犧樽浪青黃惡木熱亦蔭盜泉渴須嘗果能奪
固有利害置兩傍匪我亦匪人用托寧見傷

紅爐一勺水湧沸如雷聲德君戒終南為君歌采苓水
盡焰仍烈崎嶇閱修齡由來外一重疇非君死生風物
托茲世異種聊並蒂榮謝等春秋何勞驚多計眷眷後
世雄惟君有以似

子瞻參寥太虛同遊惠山用王武陵竇郡朱宿

三詩韻各有所賦參寥錄以相示余將遊焉用
次其韻

曾為惠山客心已寄蒼茫知今幾何時常在山間堂淹
留情莫蟄悵望身疑翔聯翩得秀句古殿逢燈光耳冷
徹孤韻神幽拂清香買舟行有期此興安能忘

三子骨已朽來者非一人簫聲起孤鳳抑按皆清新松
陰貯老月蘚暈涵蒼磷崎嶇固有屬千載無纖塵物
吾已矣今昔是可均何當事一厘顧水終為鄰

膏肓有前人老意繫叢樾差池紛鬢霜味蠟火已絕一
啜風漱液幽思起復減詎慚數及七緬予在明月踈更
蹇修途景耿重激發冷然儻可御千古同一轍

再登斗野亭路舊韻寄太虛

北舟攬黃氏楚楚不自平故步聊低回新月微風清蛙
聲語莫下泡湧浮修薨何在超世游翳路情難傾西堂
夢不到春草還復生長年浸枯枿有時懷層城適從吳
兒炊又作淮人烹皇皇徧諸侯吾人愧安行獨抱照乘

娑花枝似相明拂衣歸待旦南州逢顧榮

秦太虛出魯直所寄詩因次其韻

別子又春杪幽懷誰與謹返復事遠途繚繞如理綿家
山雖入眼尚疑隔晨煙破悶得子詩鳴雞還到船追隨
日苦短容易悲長年猶能共一轍植足臨天旋下澤政
有味萬戶自我捐唯有不捨心常如俯奔川

次韻家室送別

幾年保新阡託身斗一方問語得野人禾黍共登場遷

踈儻可老持鬚時抑揚顧非馬上才猶懷袖中剛西風
蕩微氣仰視明星光叩齒咏真主白眉誰最良師門守
邊鑰表表南方強逋誅百年寇敢謂莫我當牝雞久司
晨羣吠移當陽葦籩固難律誰可無宮商堂堂發天機
右鉞左仗黃一旦念風雲果知籌策長洗滌盡餘滓方
翼爭回翔能無出囊穎及顧箕子傍平生慣草衣豈堪
事戎行強歌出塞曲夭矯叅龍章蠅因逸驥速馬為奏
瑟昂尚期驚鼓操奮力起病牀賀蘭奪故穴安西還舊

疆歸上千萬壽重賡庶事康

和參寥過敝廬留宿因見寄之韻為謝

及此仲春月頗欲謝遠步世味久已踈何憚魚生釜青
陰合廣除似失北門路端知雞在埭未媿豹隱霧飄蕭
方外遊繾綣慰遲暮共倚青光來軟語坐良樹呼風破
炎蒸扣齒却忘慮逡巡棲鳥驚不記衣上露臨分期屢
來此樂復誰與

送孫叔靜

浮雲無定着乍合還分離廓開萬里天好是無雲時我
懷若蕭屑多感不自拾奈何情所親容易成南飛秦人
雖受寶睨柱誰瑕疵空能九賓賞終負連城歸此道固
有命如君應未遲且從淮上游霜濃蟹螯肥載取一樽
酒里門相扶携笑語欲難背古人良可期開編若對面
謔浪尤相宜皎皎澄漢月森森瓊樹枝燕地重郭隗吳
兒輕陸機曉來猶薄露會見高風披

次韻黃魯直晁堯民游馬頰歸

洋洋引天津湍悍誰為寫謀臧神所勞穹築限修野緬
懷二三子感物寓土苴郊飲束貂裘指顧來其下霜風
面欲黎踉蹌倚羸馬一笑等飛雲吾生竟何者

次韻晁堯民黃魯直蘇子瞻同賦丰稊字韻十
往返而不倦者

耿耿萬里心振衣常夜半明星當戶高仰首每自嘆是
身固虛空殆將等閒玩永懷一寸光有之詎能散南山
富蕨薇采采寧待伴不媿郢中曲誰報青玉案千載北

窓風鄭聲何可亂子職若崎嶇垢指寧與盟我慙老更
拙欲和知良難但能襲餘塵未易窺重關路年與君俱
纔此意少寬奈何捨我去鴻鵠隨騫搏岑樓起膚寸方
仍始一拳知君未易量願君更加食親髮日益白何以
為親懼以義不以時吾君正求賢只欠明光宮我我望
君冠

寄范七平涼有一優者頗相似每見即與從容
聊遣吾思之不能已也

吾友范君誼宛似丘遲詩點綴花映草草長鶯亂飛詠
詩知吾人因人想其詩不知胸中寬西域方鞭笞昔為
守禦策堅壁不容錐今作進討計萬里入鼓輦相從惜
日短既別恨見遲雖無老成人彷彿頗頴兒每見挽手
語問我將何為我非濁子者我友實似之典刑不可見
況復堂上奇邊城氣候晚四月猶夾衣青燈照冷坐素
目披重帷孤懷苦蕭屑人事終難期何當命典刑一笑
相淋漓

浴

靜坐已十日聊復資一浴我髮不滿梳安得別置沐浴
暖連頭澆快哉如出谷我生本離垢妄念即桎梏外物
强扶持何異雨中竹亦不無雨愧亦不有雨足森森自
然往無榮亦無辱振衣步空庭又見黃粱熟進退葵何
從晨羞詎宜緩叩齒感覓史虚心豈魚貫乃知抱關者
俯首固非懦烈日下嚴霜盃水沃熾炭物理自回旋何
方即吾館年來老頓逼四月未覺煖勉力更無念已矣

見此粲


第六郭將求詩久未暇今以寄之

烏延一揮手歲月如奔流誰知頭半白重見須雙虬面
冷龐一鉄氣雄吞九州門庭外雖設毫髮終無留此時
可見者如君實難求人固不易親而我獨見酌半年話
疇昔論極非謬悠但云置是事可質為冥幽功名本何
為入手如上鈎我每壯其言心肯屢回頭別來已七月
恨望逾三秋近聞復來此只尺不相投元戎奉天討知

與造化謀化城兩馳突直控咽與喉義斬萬餘級少快
姑慙休此銳且就養彼生豈容偷君謂乃吾射含笑纏
臂韝今秋取天祁明年入興州遂復都護府再見萬里
遊汾陽異世勲子政如綴旒未或便相襲且作仲升侯

送靈臺尉徐舜舉

靈臺右鶉首南北兩山間我來春未幾紅葉繞斑斑與
君早相求攜手問兩山折花飲清泉共此一日閒君才
真健敏詩句如芝蘭娟好秀且靜馥郁若可餐



姑溪居士後集卷五

欽定四庫全書

集部

姑溪居士後集卷六至十

詳校官庶吉士臣吳烜

侍讀臣孫球覆勘

總校官編修臣王燕緒

校對官中書臣高中

膳錄監生臣徐夢吉

欽定四庫全書

姑溪居士後集卷六

宋 李之儀 撰

古詩

五言

赦到後雨遂大作

昨夜聞有赦今朝遂得雨天澤隨君恩一灑遍寰宇
彼玩尚逋誅吾土久未還皇靈實神謀剪復笑談間
崢嶸若化城掃蕩如破竹開田一百里得土千萬族
不雨三

四月墮畝猶燒畚禱祈畧無應居哭行嘆嗟豈知有此
待城就師振旅上不輟板築下不妨野處秋種蓋未晚
及此壯者歸懽呼各著業賣刀買耕犁山頭夜叱牛山
下婦亦斲老稚旦出耘勤勞莫歸宿待我土盡墾俟爾
日有餘歸來笑相向共樂生無虞又聞赦書中逋欠皆
除免更放一年租其細及移變天公因愛我吾君豈違
天乃知父子間事事必關連野人語可書使我喜不寐
誰謂彼無知況欲迷向背我歌本民言未愧中興詩聞

者足以戒可是轍趨時

端午睡起和韻

豈復記佳節飽食睡亭午雖不負此身倦聽亦良苦念
初入此門只作十日數那知如忍炎倏爾到角黍本非
來質秦蓋異行怨楚端為城旦拘獨與縲紲語深坑偶
未埋大鑊僅逃煮淨持諸願力妙地叩初祖會當縱奔
鹿遂與搏猛虎蹇余愧平生何適非齟齬

大雨

向晚雲驟合雨點如車輪入夜勢轉暴對面語不聞初
疑坤軸裂漸覺河海翻傾注恣豪放溝瀆莫吐吞平地
忽五尺呼呌均四隣下堰上輒隙東塞西遽奔一身應
百給坐卧不得申旦自秉鍤刀彳亍意已昏念茲嗷嗷
農拱手過一春入夏又將半寸苗無宿根祈禱備衆伎
杳杳天九閣飢殍漫狼籍極目無煙村及此滂沛澤一
洗瘡痍痕勞我敢有詞故喜氣已溫置酒會賓客耕輟
翁語孫爾年非可期我責亦粗伸欲赴固踴躍感慨局

重門

睡起

數日不吟語已覺舌本強熟處自難忘是乃真苦相簾
空睡起足物我兩俱喪舉頭見南山依舊禿相向解衣
遶屋行未巾已踉蹌翻書試遮眼一抹如白浪目足身
所先二者輒相抗生理從可知何用更惆悵獨有梁上
燕憐我本癡癡時時作好語似欲致勸獎見爾初銜泥
生子已頽頽而我猶未歸茲事固難諒安用苦烟塵

無勞獨悽愴俯仰即陳跡未易煩度量一樽試有求傳
來如鵲盍頰味毒酒酷猛醺投晚餉倦懷豈復有舌爛
腹斗漲抱薪救烈火自取將誰讓夜分方半生劣過逃
屬續

試郭底泉和韻

午睡不覺久起坐獨捫腹眊眊相苦魔眩瞽遂為族永
懷建溪春偶爾得藏畜品第雖非貂猶勝狗尾續虛堂
無纖塵百轉紛擊筑破碾頽愕眙肩紛隨輪感被褐而

懷璧凡眼真褻瀆聊資定碗黑豈待無托綠久聞城西
角有泉湛寒玉名因所居傳廉惠纔可僕殷勤持小罌
甘瑩來一掬蟹眼方轉旋色味相芬馥邇來棘荆生未
易梨栗熟一啜便超騰庾愁空萬斛

晚起和韻

今日起差晚持課幾到午飢飽雖難醫葷酒且入務脫
粟快一飯白眼視寰宇固知等浮沉要在極纖縷聒耳
林鳩嗥舉頭梁燕乳我亦盡輪回何必高下數緬懷故

山中泉石漱深塢萬壑響松風千巖澄月露胡為不歸
去乃與朱墨侶只記入門時未有還家路我生詎應爾
炳炳莫我顧彼心豈易同吾首莫易俯

讀淵明詩效其體十首

歲月忽云徂人事只如此胡不及此時斗酒勞隣里有
田半荒蕪有屋亦傾圯強顏賓客後畢竟如何爾
淵明棄官歸議者見各別去就須有名豈獨為卑褻折
腰分當爾柴米豈無說舍彼而處此亦不苟自潔

扶疎草木長茲時豈無情未論身得去想像心已清
童山久不雨湯熱氣鬱蒸遣懷一開卷便覺涼風生

操檄烏延府已復十五年年當三十餘事事隨精堅非
惟會興靈蕪欲還幽燕誰知今白首獄吏輒差肩

晚來風稍回漸見布陰雲乘時得尺雨吾農實難勤不
願生邊地報施豈無因我雖不在事未能忘戚欣

用舍繫臨時金玉與蒿萊塵埃混瓦礫燔燎參樽罍何
云長興公陳迹獨歸來一跌竟不起念之有餘哀

我聞瘴癘地去者無生還吾凡三十口歸來盡頽頽死
生非人能得喪亦非天張毅與單豹要之皆偶然

朝從空僊出莫逐頽顏歸既謝爨無烟此外將何為堂
堂十六年子孫反無依莫作如是見隨遇聊差池

吾亦愛吾廬此亦未為得死即瘞路傍要是不免或隨
流認得性有念乃吾賊是以方丈間千偈終一點

吾友傅子淵每見常熙熙人固莫我高我固不人低問
其何因爾我蓋不自知孰為第一義只此是菩提

烏牙義禪師退居金陵與予有都城之舊能詩
喜說修養年七十餘貌類三四十許人以詩道
舊因次韻報之

幻化如空花建立等修竹四海不離身一笑長滿掬相
逢亦何有展轉猶所獨攀緣過九上圓頓繫一宿歲月
屈身臂到此非問卜心清聞妙香老句俱三復何當會
實際超然發吾覆未爾且逡巡更待梨早熟

五雲觀

五雲會中天衆山如朝宗相臣夙有約標神期此宮傍
有洞天接面直積金峰常言五百間斯地將修崇廢興
果冥符變化如雲龍緬懷祥符後天意固莫窮一言不
可復此興猶未終知國如知葬尤難邀此翁

崇壽宮梁昭明太子修行之地

鴻禧已不凡崇壽氣尤古經始天監謀餘力保大舉十
圍人何在烏鵲尚如覩井泉翳荆棘像設半塵土視今
猶視昔一笑纔仰俯有媿所坐峯安得參鶴羽

喜客泉

取逕輒林莽得地三尺餘名曰喜客泉客至如湧珠初
驚一穗起逡巡周四隅酌之甘勝醞淪茗尤敷腴物理
不可詰感歎常躊躇于焉知福地未易世眼拘

撫掌泉

泓渟宿寒藻正占山一曲平時常湛然撫掌珠可掬喜
怒去千里氣類若相属如何輒示異乃爾分遲速霜風
鼓索簫巖樹響絲竹語出若有咎路轉疑絕續幽尋力

恨短博採日苦促便擬寄無餘捨策遂留宿

白鶴觀

白鶴不復見荒臺煨燼餘昔時三茅君鶴駕常相於一
歲許一會此地幾其廬倏然自一境歷攬莫與俱兄弟
兩羽人玉骨太古鬚燒丹云未暇彈琴聊自娛日佇駕
鶴來黃緣叅玉虛身世久已忘況復話里閭

九錫庵

強臣欲竊命九錫乃所僭奈何得道人亦復有此念是

非固不同等欲示其漸石地鑿龍跌宕載極該贍漫滅
半可讀以足表龜監名存物何在遺製不少欠帝意豈
無謂人事徒妄占何適非偶然隨遇始弛擔

華陽洞天

洞天名此山于此實第八東將秦嶽連西與岷峨輒磴
道端可通足亦若相戛我欲踵其武苔徑特見滑屢試
輒復却宛似物初過周行半天下是等三四閱有無終
可疑雷同慙小黠退之固頡頏桃源蓋強說卒謂武陵

傳何殊眼着楔孔子亦獵較此理信難輟

玉簫庵今名天聖庵

白髮不我貸青山亦世情斧斤借美力遂易當時名吹
簫人可想有念應難平從茲定相忘那更隨戲成松門
挿天半竹逕梳晶榮所期茅茨永丹碧豈願營舍懷振
落日拊事悲頽齡吾生儻與歸境界滋光明

陶隱居書堂

山雲自往來人事久蕭索誰為挿小松記此常棲泊坡

陀披淺麓窈窕帶遠壑著書方呻吟誰與會所樂鸞鳳
耿莫追歲月儼如昨隱約玉簫聲憔悴金匱藥風來萬
籟奏一笑竟難約尚友徒此心相期在寥廓

姑溪居士後集卷六

欽定四庫全書

姑溪居士後集卷七

宋 李之儀 撰

古詩

五言

比部文承制移竹贈初秀才堯民有詩因次其
韻

古人偏愛竹種不虛一席相將共忘年敢憚培且植君
家占何方容易來秀色雜草出明軒翛然聳修碧剪梢

畏風推留葉期鳳食從茲兩翼足閉戶忘所適

增築貴堅厚抨繩避欹側朝灌暮復壓深虞枯易得勁
節既能主百蠹遂為客風微吟疎簷日永齒客屐此況
倘可期吾甘事潛默晉人知自完皎皎良未息不材謝
紛紜斯言愧安國

離潁昌張聖行獨出城相送

黃昏促征鞍別酒已沾醉風威危破臘雪意欲着地超
然氣類人送我奄獨至懸知必如此恐終欲弗類平生

昧歸宿恍若得所詣胡床十餘語彷彿京口例此言固
近俳要之不無謂覺夢猶在馬解鞍定何地百年誰見
牽一已乃許事繾綣兒女情回首端自愧

夜投臨潁陸周仲館待甚悉

冥行眼忽明乃是到臨潁倦馬倚風嘶凍僕望門遲初
非敢此期勢逼豈容傾是身雖無難從者固當省主人
頗料理燈燭分炯炯熾炭解噤頤重帷護寒領招魂幾
剪紙感惠非尚褻粲然一笑開那復嗟斷梗我生且莫

落隨遇輒自警轉盼已歸空區區徒畫餅

明日阻雪不得行蓋冬至前一日也

纔冬即欲雪醞釀非不久旅館黃昏風半夜忽如晝天
公時謔戲不在我先後兒心見期心咫尺弗得就密洒
良未已兀坐幾忍矣遂令相逢心感慨若奔轅紅爐慘
無光短氣猶發餽况茲嚴報本供衛何所售風威果能
神排斥勿宿留非獨寸草榮萬里同錦繡

三家店主人勸飲

早飲欲過午感此去路遙解衣酒家牀主人喜相招
逡巡出餽飮勸我飲一瓢舉手謝慙懃宿醒猶未消
報言雪滿野征轡相無聊何如酩酊去更可忘今
朝年來頗解官徑欲隨所邀端愧五漿期未覺羣心
搖偷薄日益窘妙論輕鴻毛何當受一厘醉倒同漁
樵

得常州感慈邦長老書求詩兼寄鄰老

清晨得君書遠意來吳中開緘一見面頓覺百慮空
書詞若蕭屑怪我情不通我豈逐物者君亦如冥鴻
便當

永相忘何計駟與驄聞君奮鈴槌喝下分華戎晚魚會
千指一一麻中蓬朝參月破牖暮請燈在籠坐令萬折
異沛然俱向東緣契乃如此想見圭璧叢胡為特垂手
千里尋龐公龐公無伎倆只這是家風復如多聞師亦
在兜率宮人間最勝處何必顏如童會當謝朝謁爛漫
游無窮

寄何德固

元豐初得君賜袍色可摘雍容戎馬間爽氣凌秀色十

年不相逢頷鬚已有白京塵化人衣歲月動阻隔夏屋
如深山排日許連席坐中多可人一笑每墮幘人皆指
為誇我輩日所惜于今已三見爽氣若初得同言胡乃
爾前致作嬌客邊城久不雨旱氣幾爍石俯仰數刻間
咫尺便南北寄聲不敢輒問訊莫我獲但問深閉門鴟
坐較定力雙林舊家風龐老真消息莫作分別想認子
却為賊造門會有日聊復銛戈戟準擬詰朝見無或但
堅壁

燕子和韻

依依梁間燕終日密相對本不欲爾期何為尚此會得
非緣所遭又恐意有在飛來復飛來好語如湍瀨我亦
強維繫爾豈知向背萬事杳靄間一笑沉吟外玄妙第
一義為爾降障礙卷簾見天下始信物有大

次韻方叔晚過湖上時積雨新霽夜色如晝傳
聞余有興元之命

醺水投過日佳思生襟裳緬懷江上笛相游共胡牀星

月弄疎明草木來遠香所得亦飽爾端能謝矣涼

方叔并用前韻復繼之

蕭然傲環堵心性嬾衣裳匝坐定何許井井書滿牀我
每不欲去鼻觀無盡香未始有寒暑彼哉自炎涼

句容澄上人羣玉軒求詩

日日不離山愛山終不厭因地端有來及此若尚欠當
軒出巔屹昏膜遽効砭枝撐簷楹窄明滅煙雲暫幽禽
時一鳴隱約隔天塹早聞羣玉峰世境未易占却應三

昧力易致茲可驗便擬絕高深兩足恐不贍幻化浪攀緣膠擾窘囊檻會須揖清風方暑對枕簟

送忠禪老詣徑山請普覺住天寧萬壽新刹

我初遊叢林得人如滿月細披雲霧間桂影若可掇旋轉二十年相半分會別暮途喜可掬妙語等冰雪告我第一義光艷忽振發老魔俱辟易善類隨擊拂是真萬里足一舉安能輟徑山光慙韜夜氣尤昭徹異時摩聊老薦藉意甚切子果識至人指顧石必裂出我連城珍

郊廟冠前列無令則足翁二獻文為拙

因服藥飲酒一盞

東坡在黃州飲酒只飲濕我今又過之醺漿如薤汁平
生不喜酒興來且莫繫長虹偶爾放因復投一吸入口
舌欲脫下咽蟲爭泣熇熇腹將裂窸窸淚莫裛頑涎離
血唾心悸如鼓集卓爾無一事荆棘強自入主人固好
飲宿興亦素緝如何似見毒使我卧復立彷徨日欲落
稍寬困眼澁夢覺天未明齒頰猶習習是邦居不非奈

此掩弗及昔聞禁酒國今見毒酒邑作歌寄一笑倦悶
聊救急

老杜槐葉冷淘句凡十人以君王納涼晚此味
亦時須得須字

百年觀不足一日樂有餘況茲夏日長而與君子俱號
呶謝呼笑談論皆詩書門外方爍石坐上如水壺仰懷
冥冥鴻俯愧戢戢魚我老百不堪嗜好終蒲菹殷勤相
得心黃昏尚躊躇追隨自此始莫厭頻招呼何必得美

酒然後可將須

張聖行解官入京僚友餞別分韻勸酒得醇字
密雪不着地朔風煖如春天公豈無心慰此東歸人吾
人晚相投每見每更親踰年稻粱俱未覺旦暮頻欲識
分淺深蕩蕩風中雲問其美如何表裏無緇磷深湛子
雲默高廣太丘真汲汲惜日短奄茲奉離樽莫辭十分
斟酒薄情則醇庶幾一舉盡涇渭從此分萬里自咫尺
百歲均埃塵行人定向識他年期問津

常州感慈邦老相遇甚款聊復申叙

十年不相見一見情愈親執手語半塞但覺頻沾巾別
來事多矣未易咫尺論感君冒雨歸知君意彌敦邀我
過其廬燈火如春深金碧炫境界恍然驚一新為我時
置浴仍為加枰殮止我腹中飢振我衣上塵何勞強剪
紙已復收斷魂添爐接鄰坐軟語尤殷勤閔我憂患餘
漂泊纔此身勸我葬且居生死相與鄰清晨陟高座四
衆如雲屯展轉叙契濶博辨河海翻句句不妄發信矣

靈巖孫歲暮能幾何
繾綣誰我溫非君美
無度涇渭那更分
相期在來日擊節徒諄諄

子重相率遊任園

蹈雪入窈窕
蒨蔚如深春
左右無佳色
老綠不改新
小牕茅茨下
園翁叙慇懃
主人謂此翁
好事絕等倫
養生惟養花
種種皆躬親
每到二三月
爛漫如錦茵
問翁何所有
品目如何分
翁云世間本
搜採無遺根
牡丹三萬株
兼取洛與陳
芍藥揚州來
密密攬魚鱗
雜花極目是

浩不知涯津四序更代謝顏色常相因我適來非時猶
得聊逡巡約翁待花開許我論主賓

獨坐有懷張聖行王成伯偶讀摩詰詩因借其

韻

老鶴志千里候蟲戒三秋此理定如何宛在水中洲我
師南榮去生從知北游歲暮良鮮歡不如狐首丘寒燈
伴岑寂河漢窓間流緬懷雙白壁路斷水悠悠摩詰頗
解事好語供我求坐令不可遣奄然隨遇收歸程只旦

暮妙義思賡酬君謂我輩人吾匪斯人儔且將有限力
相與窮深幽

久旱湫舍殆不可遣免一夕雷雨忽作

半夜一濯雨斷夢失矣蒸汗甑不復鼓蚊雷為之停逡
巡萬竅號破窻風如傾絺帷強主宰庭砌已滿盈極護
老稚奔懽呼閭里情但覺萬里返浩蕩隨滄溟掠眼纔
閃爍劈耳俄掀轟豈暇計飄溺且護嬰兒驚小休月在
戶却視斗挂甕唧唧與啾啾次第先秋鳴粵從臘雪後

旱魃苦自明焦枯病三農芽田不滋榮隴畝半折裂几
席饒蠅蚩端若一大難耗焉猶宿醒點我讀書燈涼宵
聊與征庶几簡牘中暫寓蠻觸爭

姑溪居士後集卷七

欽定四庫全書

姑溪居士後集卷八

宋 李之儀 撰

律詩 七言

讀東坡詩

邊州守禦謝沈機獨喜身閒是道師獄吏難堪非素料
病懷無計復何辭空慙南郡三家學賴有東坡一集詩
永日風埃惟愜睡到頭不比在家時

次韻見寄

矩不成方圓不規倦途誰與相多儀門深不擬睡教熟
舌強猶防語或知無事且尋黃面老關心休問碧雲姿
此身未必終如此長日猶吟十首詩

東坡流落坐多言我欲無言亦未全好辨懸知非獲已
力行到底信為賢抱琴有味無彭澤沽酒何妨問玉川
只擬飲呼出門去強麋置網豈當然

罷官後旋營居舍寄贈存之

常恨官居如傳舍，愛君池館葺初成。
偶同罪垢歸無計，聊喜私巢得暫營。
闔戶開窓留晚日，栽花引水趁心情。
此身何處不可老，況有吾人似弟兄。

次韻見問

東西南北為誰忙，蔡澤噤吟舊笑唐。
路斷不妨頻打睡，心清何必更燒香。
尋思有似黃州味，潦倒休嗟白髮郎。
近免竹筒拘月費，主人時亦破慳囊。

五月旦日

睡餘落莫肘難支
節物依然我自衰
已悟龍蛇終不與
何須龜筮強稽疑
孤懷佛語雖能遣
歸路佳人已歎遲
共弔沉湘無數日
却嗟輕負習家池

晚雨寄涇州劉晦叔

晚來又有數點雨
聲入鄉人拭淚中
漸喜濃雲初蔽日
只愁深夜却回風
閔憐焦槁非無意
祈禱精虔信有功
聞不茹葷幾兩月
使君憂樂與民同

端午

綵絲百縷紉為佩艾葉千窠結作人散誕何妨兒女戲
漂流不覺歲時新清歌尚記書裙帶舊恨安能弔放臣
角黍粉團矜節物一樽聊與寄逡巡

曾約佳人端午歸又期僚友面南池誰知猶阻重門鎖
未擬輕為故國悲九節菖蒲應好在十圍樗木正相宜
微行細約寧忘我却話今朝會有期

傅子昌歸興州

嘉陵江水接天流州據江流最上游憶昔練衣隨跋馬

而今白髮任虛舟慶門譽望聞來久塞路殷勤得暫酬
見說明朝却西去長亭揮手恨無由

余入院二十日相知往往寄聲相勞獨何德固
寂然無聞

何郎本是風塵外平日仍同般若因有底新來便如此
定緣無事不相親薰蕕何得同薜蘿簡潔安能別孟津
會借天河三級浪終須流出舊精神

留別子淵

等閒相見即相親
冉冉風流一段春
未論典刑思舊德
便知材業是當仁
他年雞黍情無限
此日詞章筆有神
落盡節旄羶未壓
疾風勁草定何人

送馮子莊赴秦州將官述其督詩之語以廣篇
首

我詩易得君休嘆
君節難攀我自知
問會但嗟歸有日
奏功方看獨先時
簫笳部曲催驕馬
綿繡山川入綵旗
莫訝黃金偏滿手
平生闕是男兒

重治寢榻更衣蔬食

五月相將又下旬
依前深院度黃昏
頻看嶺路占家信
旋兀簾旌作燕門
抖擻衾裯防垢穢
湔除蚤虱斷兒孫
不因肉食脾難磨
且欲從今習菜根

周臣約過景裕第會飲先寄此詩卒章因以投誠也

懸知昨過鄰家館
更挽明璫問玉釵
雖喜黃姑論隔歲
偶陪摩詰事長齋
嘯歌未闕雲間接
鶯燕難逃席上猜

預悵醒醒獨回馬何如為賦酒如淮

次韻題隱居巖

隱居何必在山巖境界全歸指顧間能把軒裳為外物
便應風月勝酩酊地連紫禁千重邃石繞清泉五色斑
從此夢魂猶可到定知衰廢不容攀

次韻見懷

林泉廢疾固難除杳杳觚稜寄夢餘已到東山知不免
須由北海本來疎功名漫笑乘軒鶴事業終歸種樹書

聞道江樓巢已穩未應長缺歎無魚

次韻病起

天時人事不相尋遽食蒸豚廢古吟誰感親顏前約短
常知聖日後綠深風雲疊疊天邊路霜露惜惜壁上琴
我亦臨風頻拭目看懸金印到山林

次韻子椿見寄

一逢佳節一消魂青徹江山綠滿園又把鋤犁聊自遣
却嗟身世獨難論三鍾切幸資三徑九奏時猶夢九門

勝處何能偏見憶便應佳思襲香蓀

次韻子椿同關聖源吳師道贈董無求有懷米

元章

海嶽仙人不我期碧雲幽恨獨心知坐間優孟已難別
筆下羊欣更出奇自是人才空立異當知臣叔本非癡
重輕到了存公議揮扇何勞強執葵

次韻師道子椿題仲強樗亭

王門平昔早相求幾向樗亭得趣幽從別風光應似舊

每懷勝麗只搔頭塵毛抗論傾終日玉指按花泛晚秋
老盡鄒陽還憶否密移空自感藏舟

次韻子椿九日登高見懷兼呈君俞相約尋春
重陽曾記客京埃江國相逢又七回感舊只如春夢斷
登高未許壯心推方嗟陳迹何時見底事新詩到眼來
便好扶藜披節物猶勝落木對空壘

次韻闕聖源送董無求

何勞楚些為招魂是處春風似僻園可復京塵難共樂

却應江月要深論
燈花昨夜占行館
鵲語今朝報里門
想見慈顏問行李
一樽浮蟻侑芳蓀

次韻聖源無求兼懷元章

羨門不見見安期
流水高山獨我知
門徑踏穿行復爾
靈丹掾活信能奇
換雖得辨纔三紙
借恐終還是兩癡
不用艱難成發塚
紅樓親共賦烹葵

次韻師道送董無求兼寄師道

骭髀從來不易傷
低徊身世亦悠悠
離羣斷鴈雖難偶

得兩明珠豈待求強挹餘塵時琢句問尋陳迹自經丘
清時醉尉知何在似是人多識故侯

和人臘日

又聽村村臘鼓鳴年豐物阜慶清平星霜陡覺歲華晚
時序祇傷今古情裝景雪花飛點點催詩雲葉亂英英
自慚伏臘尤多誤和語煩公子細評

題壽椿軒

江左風流不乏人能將佳思洗埃塵坐中煒燁當時士

庭下扶疎上古椿日永清陰怒鵬翼月明翠影鬧龍鱗
雲泥路絕無由到猶欲乘槎一問津

次韻米元章

蹭蹬生涯可否間強扶衰緒欲觀瀾蓬生雖託麻方直
器就寧嗟木是蟠晚寄鄉閭端有謂時容雞黍共論歡
連城未薦難為璞莫與堅珉一眼看

仲春季澤遠來相訪感往念今悵然有懷

異鄉流落十三年老日從誰寄往還久歎斷蓬飄世外

忽驚連壁下雲間生涯已約同他日詞筆端能慰顛顏
準擬新秋便相見為君終日倚柴闌

書王子重閒軒壁

經年問疾漫持想今日登軒念自空不能碌碌遽如許
定應剪剪將無同人喧渡口似瓜步木落沙頭疑渚宮
莫辭眼力徧沙界回首臘盡還春風

同子重望長蘆寺

窄堵波寒對水東坐來初報夕陽鐘回環桑柘疑無際

咫尺雲煙隔幾重
聽講有心陪寂寞
杖藜何日許從容
主人境界諸緣盡
應笑規規着畫龍

陪子重游長蘆寺

行來思住覺城東
粥飯隨緣早晚鐘
安得心田荒萬有
便驚眼界失千重
笑談喜接真摩詰
衰病休嗟老曼容
餽飲殘羹應不惜
聊分水墨為成龍

德山方老退院索詩送行即席口占

應供都城今幾春
屢陪香火是前因
偶來清漢堤邊住

重見東林社裏人青眼畧容談近事白頭同喜得閒身
自言此去尋思大便好乘時繼後塵

朱伯宣才英昆仲見過曲相慰藉因留飲得花
字

新春窮巷幾傷嗟聯壁俄來照蔀家意厚旋傾新釀酒
眼明初見未開花百尋自是松蘿老什襲終慙玉有瑕
便覺賦成無用處漫勞憔悴歎長沙

題僧道符天游齋

六鑿相攘不整休超然誰復與天遊
醞雞甕裡自歌舞
野馬牕間空贅疣妙境界從拈處得生涯
須向箇中求
逢場作戲由來事可笑區區問髑髏

姑溪居士後集卷八

欽定四庫全書

姑溪居士後集卷九

宋 李之儀 撰

律詩 七言

除夜寄王性之

老戀窮年怯五更可堪爆竹響新聲但驚燈火如殘夢
豈有心情敵後生錫競膠牙空對白酒期分歲獨憐清
賜袍應有天香在想見明朝奉九成

又寄性之二首

霜髯雪鬢十分侵舉盞常思蘸甲深雖約依劉同漢上
猶虛訪戴似山陰文章歆向傳家日事業韋平奕世心
冰玉相輝方自表何妨佳思屢追尋

平日鵲鸞接武中汪汪每歎不能窮整煩朱轂圖遺愛
方信清時是至公千載難期人物盛一時休歎馬羣空
何妨坐轍追陳迹應有新詩襲素風

聽惠師琴

牛鬪淹時兩耳昏偶陪沈祝共僧軒
數聲抑按披香霧
雙屨分明在曉原
物節不堪催我老
賞心聊復為誰論
初年記得山陰舊
又見夷中幾世孫

春日

芊芊芳草望中迷
傳火樓臺麗日西
飛絮輕翻遮柳陌
落花亂點暗桃溪
琉璃波淨沈魚藻
玳簾疎阻燕泥
百五良辰最惹情
綠陰行馬過鶯啼

覺老求詩

江南江北久相望常負靈山一炷香會上拈花雖未笑
坐中持鉢頓生光投針技倆空諸有彈指莊嚴自一方
何必湯池能離垢入門心地已清凉

覺老見和復次韻報之時雨行未得

去隴回岡翼兩傍舊緣來繼鶴林香隨時解致留客雨
涉世圓能出定光運用投機疑有象縱橫垂手固無方
倦遊累接通宵語時覺楊枝灑面凉

真師約過寄老菴雨不止兩日不得往小霽輒

涉淖以契前約次其所示韻菴壁有孫莘老秦
少游劉貢父諸君詩

一接深言一點頭離騷致處未為幽不嫌壞路容連步
且欲他年作舊游翰墨抑揚雖已晚林泉棲止會終收
孤雲祇恐元無定候我歸來共此丘

次韻陳致君題硃砂湯

造化工夫豈偶然一池如沸自澄鮮論功但可資沐浴
有理不須深究研流落未妨供淨社升沉何用較溫泉

更宜場稼猶能就凡占餘波盡美田

同祖燈過陳氏書齋主人留飯遂求詩

一牛吼地得林垌邂逅經行眼暫明挾策讀書雖未暇
殺雞炊黍喜相迎依依高柳來棲鵲炯炯黃花弄晚晴
自是主人能好事非關秋日解多情

石磧朱希仲館穀甚勤因題壁間

主人好客久聞名曾約江魚對酒烹邂逅相逢同一笑
逡巡不覺到三更屠龍手段元非策畫虎工夫浪有聲

便欲與君論卒歲却憂舟子報潮平

清涼寺覺海召飯出數帖相示覽之愴然求詩
為記

潮去潮來知幾年依然城郭帶山川連虛玉骨元如虎
布地金沙舊種蓮垂手鼎開香積供傳家仍是乳峯禪
珠庭月角人何在賴有遺蹤契宿緣

崇寧求詩時正初老住為初祖

烏衣人物已成空窳堵纔能記寶公請祝驟開新福地

全提還振舊家風，千巖日上春初到。
萬里雲收，月正中欲識投機無意盡，江流入海幾時窮。

范倅置酒雨花臺

流傳勝致有無間，投老方能一倚欄。
千里江山來極目，萬家烟雨鎖初寒。
姦雄幾許埋秦莽，笑語何妨擁蕙蘭。
便覺寸陰真可惜，須將酒戶為君寬。

寄趙仰之

傾蓋逢君亦偶然，頃篋今日似當年。
仙風宛是金華舊。

詩句分明歷水傳故國江山聊徙倚深燈歌笑屢遷延
相思果許重相見豫約嚴裝報此緣

次韻邦老見貺

高風疇昔在煙霞末路芝蘭屬當家一句轉身元的確
千條差路任紛華才疎意廣雖難契語款情真特見嘉
只恐平明便分手相看更待月西斜

宿無錫壽聖院贈明祖禪老

靈山相別已多年重把圓光信有緣愧我天涯真斷梗

喜君居處似諸天元無浮世多般事只說我家一味禪
軟語綢繆霜夜永停燈溫火共留連

元白拏舟相訪出紙求書因書此以歸其紙

小蓬不卸遠相尋頓喜忘年得斷金便覺雨華隨脫塵
更能操筆問來禽投懷方寄朱弦直摻袂還驚白髮深
獨幸南遊慰真賞他年會見好叢林

同熙績姪登有美堂

雪晴時節臘窮天湖海光浮萬井煙勝槩尚能驚老眼

曠懷無復似當年難堪塞鴈終聯翼賴有龍駒特象賢
已約一廛須卜築不妨當此共遷延

錢塘教授宅飯眠齋次其韻

饑時嚙飯困時眠任運騰騰信自然豈謂故人投此況
先來佳處作閒仙寓懷何必開三徑得句勝如食萬錢
只恐里門驚內史不容同占好山川

次韻錢塘節士見寄

平日剗心欲致君異時攜手但論文興來只有歸田賦

老去何如背水軍占勝已驚無不盡卜鄰應許鎮相溫
形容豈敢輕酬酢謝傳風流自出羣

阿濫堆

二首

鐵作驕幢不易摧望林誰免渴趨梅院門報鑰人初斷
天氣纔陰日又開倦路已先衰鬢雪思家難遣寸心灰
衝風正起還飛下何物元非阿濫堆

年來未覺壯心摧昨夜偏傷三弄梅不貫離家遽如許
自然昏眼亦慵開蕭條寂寞思樗蔭細繹華嚴謝却灰

少味童山莫分別直須真峭比離堆

食牛炙

西來誰為炙牛心惜事拘之不敢尋豈謂鄰邦無百里
驟令饒口得千金登臺未論前人比捫腹翻驚用思深
從此耒陽休弔古便思白酒與同斟

元祐末宿秋試院曾和王敏父四詩是時以疾
先出院方欲出而未得況味有類今日追用前
韻再賦四首

堦除又見日將斜若此奔馳尚可誇敢覲陰功踵定國
未應和藥困王嘉門前禱雨頻催鼓眼底無人但見花
不比貢闈當日鎖病來有許便還家

兼材莫作尹翁歸自鶯崎嶇不畏非妄役土龍寧得雨
可堪芻狗強蒙衣移文不報如沉井行路皆疑鎮掩扉
早悟垂頭供立仗好隨四牡去駸駸

沉沉深鎖出無涯白盡于思豈復華準擬歸期叩端午
那知此地見葵花幽憂未論如陰府倏忽翻驚走電車

久病元來最欺眼
蠅頭只覺似棲鴉

十年三拜東門敕
長是尋燈濯汙裾
贏得平安題報曆

不妨朋友校殘書

未引試前與敏父相對校書

歌傳鵲鼠非行路
詠

入烏狐愧大車物
物背馳將老矣定知身世欲何如

若禊告行再寄二詩

前日報君明日行
強憑詩句寫離情
懸知北海經旬別
須滯韶山半日程
環席已甘攬上首
餘壘應不負同傾
預期一笑東門外
剝記樽前醉裏聲

又

醉裏新聲解記無祇應琴意似相如近來公道偏難得
從此佳期敢妄圖玉室金堂有阻隔兔葵燕麥恨扶疎
冥鴻不比尋常鴈試覓蕭娘一紙書

辛章代
于直意

陽翟道中有懷存之二首

頑陰將臘襲衣襟倦轡臨風愧白頭一事無成還歲晚
百年過半尚人謀天邊漫鑄黃金印月下何時紫綺裘
擬借東鄰分一徑未應人物謝羊求

又

夕陽風裏得君心
常約清香帶月尋
紅萼似披經幾嗅
綠條如弄已難禁
野狂不慣娉婷醉
蓬鬢偏宜蓓蕾侵
準擬歸時更浮動
瓊樽寧謝十分斟

次韻梅花

送臘迎春亦是常
獨高梅蘂報年芳
風來髣髴逢荀令
月下分明見壽陽
開徧漫誇千種韻
天然別是一般香
從今漏泄東君意
直到霜前菊蘂黃

嶺上纔分一寸光，羣花次第促來粧。
絕勝羣玉山頭見，須信昭儀體自香。
妙賞不逢徒老去，佳期難得為誰芳。
定應癢處無人會，空怨相邀客姓王。

智臣相過成小詩

智臣善談命

紺髮朱顏氣吐虹，崢嶸頭角振家風。
千金自晦鄒王後，一笑時游管郭中。
老子已應終汨沒，諸兒聊為指窮通。
他年朱紫相輝地，莫惜高軒訪此翁。

瑛侍者欲再游方作此勉之

精神秀發真獅子聳壑昂霄似出林擊竹有聲先了悟
拈花微笑已知音新詩富健疑披錦妙字清奇不換金
往往秋高又飛錫白雲來去本無心

姑溪居士後集卷九

欽定四庫全書

姑溪居士後集卷十

宋 李之儀 撰

律詩 七言

有送梅花者而彥行適在君俞來

來時點滴纔髣髴今日爛漫將飛揚
春事不知尚多少客懷空自成悲傷
新名侯喜足詩思舊病維摩難藥方
共飲節食冷相對少須陳子同飛觴

失題九首

結束輕裝趁曉風
崎嶇行李偶難同
他年誰謂雙成老
今日翻為無是公
祗恐穰侯遲見事
固應原憲本非窮
洛陽煙靄因緣在
雞黍相期定不空

上番新梢與舊齊
啄殘紅腐半成泥
畫船似覺去已晚
麗句猶堪手自題
氣候相催雖迅速
笑歌贏得暫招携
紅舒綠卷分前後
全勝當年白集西

君方陵愈我慙郊
大瓠為舟浪自要
老矣獨期雲駛便

歸與長負桂叢招崢嶸紅橘迎風密點滴安榴掠望燒
多謝闕萌滋味永便思飛步到楊寥

佳禽百囀不驚風午日濛濛睡眼中幾片猶飛殘臘白
數枝初見出牆紅低回節物憐遷客漂泊生涯難老翁
多謝春光相擊拂一樽傾倒許誰同

窺豹曾容見一斑孤高凜凜固難攀早應拔宅朝元去
猶有遺踪在世間舒歎歎談雖可想賞風吟月未終閒
諸郎莫為功名老須信移文下北山

映月臨燈萬萼披喜隨賓客宴芳菲諸姨隊合驪山曉
獵騎夜從雲夢歸須把玉觴酬勝麗徒勞彩筆強依稀
回頭便見飄紅雨莫惜頻歌金縷衣

映月西湖漾鴨頭墮紅飄碧正飛浮逢師來自日邊路
如我遂歸江上州嵩嶺異花開未遍洛川新燕語方柔
經行須作半年計歸去當知難再求

薄雲疎雨灑雕籠槎拂銀潢月上弓紅淚半殘歌後燭
翠濤低湧夢回風萍餘鈎雖為利解盡犀稜未見通

杳杳芝田定何許斷魂無計脫驚鴻

華棖曾記孔鸞棲斷夢還來拂舊題妙悟從誰識無射
賞心空自感雌霓干雲寶氣層霄外埋玉孤墳落照西
千載相逢定何許嘐嘐風雨獨鳴雞

聞葬者

鐃鼓高低與哭聲同尋此路不相驚年來自是多傷感
簾外何須問晦明未返耕桑真拙計長縈韁鎖奈虛名
無名可應何貪着餅壺須休莫強傾

律詩 五言

過蒲地寺謁田承居

蕭寺經行舊騷人趣尚幽從來不妄許相見若為愁
稅駕終何地乘桴可共舟感君詩有味老去復誰求

子重見過夜話

坐久日將落窻前雲欲平倦遊淹歲月旅悶等坻京
已謝長楊賦猶懷古劍行擁爐雖有味琢句苦難成一
笑逢吾友諸方舊著名景山慙絕曠擊節愧深耕奧妙窮

三際堅剛敵萬兵誰知俯冬杪頓覺得春榮繾綣桑榆
恨間闌兒女情金篦何足道閭室斗光明

三家店早飲主人似喜余至而庭下殘花猶在
也酒客輒見避余固止之因得攬其醉態

再過三家店還投舊酒壚重攀紅躑躅爭認白髭鬚所
惜自拘束無因同拍扶他年遂卜築終為伴歌呼

醉人休見避我恨未如君到了輸他樂何須強自分稻
梁姑取足雞鶩漫離羣上馬衝寒去回頭愧壘雲

次韻真師移植新竹

錦棚方有托粉面轉相疑
漸露凌雲節微分弄月枝
高僧開檻賞野客帶砧移
只恐成龍去空來歎此時

宿湯泉示真師二首

睡美不覺曉蛻然猶戀牀
未能忘夜旦已自懶衣裳
供佛添新水持經續舊香
不知門外路何事有歸艎
粥後復就枕夢中還在家
老身知自妄病厭事如麻
漸覺同芻狗終當悟寶車
何妨驀直去細啜趙州茶

朱希仲設榻溫密與直師榻相對明日雨止送
過金陵

居士留我宿虛堂照一燈如逢永平夢仍對竹蘭僧髻
髻三無愠間關百不能平明失簷溜飲喜話金陵

真師自湯泉相送至石磧遂歸索詩為別

流落不我棄如君能幾人寧辭迂驛路且喜慰情親
踰還逢雨因循懶問津尤慙遠相送誰謂白頭新

石磧阻雨夜分睡覺枕上

一夜雨不止渡江還不能誰知未歸客獨自對孤燈
祿食強作主生涯端是僧都來如一夢隨處且騰騰

遊石磧寺寺僧以牌求詩

花石鎖風烟軒楹半是山門連虎溪路橋接趙州關
屈曲深疑步高低屢解顏却應多是夢不伴此身閒

茅山道中抵莫投一客邸甚素雅主人喜客乃
一善士為待至厚既別留此致謝

客緒如縑繭山行似踏車方疑武陵宿宛是德公家
傾

蓋君何厚論心我可嗟祗應從此別去路隔雲霞

除夜小舟中雨不止而作雪寄德麟

醉侶今何在寒燈倍黯然却應聽雨夢猶是散花天老境不自得客程誰我憐曉鐘催去路明日又新年

腰痛醫者饋藥以酒為使命酒對燈欲飲不能我固不善酒醉中常獨顛不詞譏濩落祗恐負妖妍迹類懷沙悴心馳濁世翩空樽聊口誑繼晷漫膏然未分窮投魏長思夜別燕蛇驚元有影蟻慕本無羶兀坐疑

癡鶴忘形已蛻蟬滄溟雖可徑何意逐鯨鱣

燈下試婺源楊生筆和韻

跼蹐數椽內回旋嬾步中艱生乃至此吾道得非窮
詢鞠元無術行移底是功可堪追兔鼠強學注魚蟲未厭
朝蘼綠生憎夜燭紅呻吟慙杜老感慨謝終童奏剡何
時發微連幾日通親知還悵望應是轉衰翁

江上獨坐

春至猶飄雪江寒未有魚無人慰青眼盡日對紅爐瑟

瑟憲頻響惜惜鳥強呼潜然不自覺豈待到窮途

書崇寧觀黃道士火櫃壁

地肺聞名久崇寧請祝初仙家豈興廢物理自乘除羽
客論歡舊紅爐勸坐俱斯須竟何有聊復慰窮途

同趙德麟宿長河堰僧房德麟遙相送至此且
約明春再相會有詩見及次其韻

泫泫一夜雨皎皎百年心歲路無多日僧牀有剩衾長
卿空滌器季子漫多金賴有綈袍舊春風定可尋


大觀四年二月二日自采石過藏雲取路回遠
少憩已入夜遂留宿明日聽師相邀登覽偶見
西偏地真一方之勝也余方營墓庶幾得之以
託妙緣既去因留此詩

挑菜逢今日藏雲訪近山路紆知晝永心遠覺身閒未
信塵埃隔猶疑夢寐間佳城更何卜便好輟屨顏

書長干僧房二首

赤手能搏虎青羶不與偷真知外物重未放此緣休平

地見山嶽排空回斗牛何須待塵劫才許證前秋
問訊無尺寸順風留歲時傳聞萬金積未嘆一生疲突
兀端可想高明還此期他年問初祖却是寧馨兒



姑溪居士後集卷十